

HSET I PHIERO'

Bàu hmàih ka oh daq

¹ Phiero mangai tiaq cla da Chauq Jesus Christ, achìh ka bài mangai rìh paclac tagùng Bong, Galati, Capbadoc, Asi xam gùng Bithini, aih bài mangai khoe jah ràih,

² tiaq kan loq dèh adroe da Boc Plình, aih Baq, jah kan basròeh enh Yiang Hadròeh, hu iu tiaq Chuaq Jesus Christ òòeq jah hadai wiang rai mahim haq: waiq kan tabàih dech xam kan catèm jah rai èh rai bàc ka oh daq.

Kan tangèh da mangai tiaq Chuaq

³ Manè apòi Boc Plình, Baq da Jesus Christ aih Chuaq bèn, haq khoe yóc manoh loq waq kàn kaiq òòeq broq bèn jah ha-uang lauq, òòq bèn canòm kan rìh hlài enh mangai cachit da Chuaq Jesus Christ òòeq hu jah kan tangèh rìh,

⁴ aih raq kùng hang ùh raliang hnhung, ùh axiang, ùh lùch khoe padon ta plình òòeq am ka oh daq,

⁵ aih bài mangai i manoh lùl canòm ka cwiang itai da Boc Plình wèq am, òòeq hu jah kan dèch claih, ma khoe ten loh ta hì atiq lùch.

⁶ Oh daq lem bùi ka bàc aih, yac ka manòeq kô oh daq glàm kan qnhro bàc trong broq ka oh daq ep mangò òeh toq biaq,

⁷ bài kan qnhro aih broq ka manoh lùl da oh daq jah yeo lem ùh hnau ka wang aih hang ma loq om hech yac ka khoe bùh xi ùnh, òòq oh daq

jah bàu manè, jah padèch ta kan qngah qngai jò Chuaq Jesus Christ loh ta cröng taneh.

⁸ Haq aih Mangai oh daq ùh hnoq mahaq camet, yac ka manòeq kô oh daq qnhòq hnoq haq, mahaq oh daq lùì haq, rai lem bùì pì cajaq ta kan ranhòm:

⁹ jah kan baha ka manoh lùì da oh daq aih la kan dèch mahua yiang oh daq.

¹⁰ Anoe trùh kan dèch aih, bài mangai pajàu khoe ti hamrìh ti boq chaq, khoe capoch bàu pajàu trùh kan tabàih ma khoe taqmroq ðòeq ka oh daq:

¹¹ aih wì chaq waq ka jah loq qnhòng leq, qmang leq cadèh Yiang Hadròeh da Christ ma oe ta wì haq khoe mahnu, jò chônñ anoe panhìn kan xalep da Christ xam kan ranhòm tiaq atìq ka aih.

¹² Wì aih, khoe loq ùh xài wì haq patìh ka cla raðeh mahaq ka oh daq, aih bài biac manòeq kô ma khoe anoe qnoh ka oh daq, loh enh bài mangai ma canòm ka Yiang Hadròeh enh plìnñ, ðòeq hnài Bàu Lem am ka pì; bài bình plìnñ hadai tangèh jah hnoq bài yiniq kô.

Pariaq thê rìh hadròeh rai loq waq

¹³ Qmang aih, oh daq ep cachang ðòeq ta gàu ngoc tiàh ka rìt caqnam, loq amàn, yôc dìq ka manoh ngèh ðòeq gòm kan tabàih jah am ka raðeh jò Chuaq Jesus Christ trùh.

¹⁴ Oh daq khoe wìa wì kon ma loq iu bàu, aih apaq broq tiaq kan dù enh nèh, jò pì oe raq qnhòq qnì cleq.

¹⁵ Mahaq tìah ka Mangai ma creo ka oh daq aih hadròeh, aih èh ta rìm trong acaq oe, oh daq hadai ep hadròeh,

¹⁶ majah qmang aih i bàu achìh rameh: “Ep hadròeh, majah qmang aih au kô hadròeh”.

¹⁷ Tàng oh daq creo ka Mangai ma ùh hìaq loq waq ka apah, mahaq hadrah ka tang ngai tiaq tang yiniq wì haq ma broq, aih Baq, qmang aih drah yǒc manoh loq iu yùq òòeq hu rìh acaq taqnòng rìh òò kô,

¹⁸ majah qmang aih, bèn loq ùh xài canòm bài dahwèq ma loq om loq búc qmang ka bac ka wang oh daq ma khoe jah baxon claih ka trong rìh acaq ùh loh cleq da kan cadraq ma khoe òòeq hlài ka bèn,

¹⁹ mahaq xi mahim canaq da Christ, tìah ka mahim kon trìu ùh i ka xit ùh i ka habau,

²⁰ ma khoe padon qmòe enh adroe ka broq plình crǒng taneh, khoe jah paqnoh taqnòng atìq lùch kô am ka oh daq,

²¹ aih bài mangai khoe canòm ajang Chuaq Jesus Christ òòeq lùì Boc Plình, aih Mangai ma khoe broq ka Chuaq Jesus Christ enh mangai cachit rìh hlài rai am ka haq kan ranhòm, òòeq manoh lùì xam kan tangèh da oh daq canòm òòeq ka Boc Plình

²² Manòeq kô oh daq khoe canòm ka bàu joq qnàng òòeq broq hreo dèh mahua yiang, òòeq i manoh loq waq ka dabau joq qnàng, loq ha-och ka dabau òòeq ka manoh;

²³ oh daq khoe jah hauang lauq, ùh xài xi adrech loq om hech, mahaq xi adrech ùh om ùh hech, aih xi bàu kan rìh cajap cajình da Boc Plình.

²⁴ Majah qmang aih:

Rìm xech akia bu diang nhat,
Kan nhòm da haq bu diang riang nhat.
Nhat croh, riang hadrùih.

²⁵ Mahaq bàu da Chuaq oe mòeq òe. Aih raq
Bàu lem khoe anoe qnoh ka oh daq.

2

Jesus aih hmo rìh

¹ Qmang aih, oh daq khoe cađac rìm trong
ngang dù, kan loq qnùt, kan ti patìah, manoh loq
tajênh xam bàu capoch troq,

² aih drah bêh diac tôh yiang, tìah ka kon qyoh
neo hauang, dōq oh daq canòm ajang aih hu jah
yòng kàn òeđeq jah dèch dèh mahua yiang,

³ tàng oh daq khoe loq Chuaq Jesus aih lem.

⁴ Drah thia ten ka haq, aih hmo rìh mahaq tì
kōng kon mangai khoe khwênh đac, mahaq khoe
jah raih jah dì wìa hmo canaq enh ngèa Boc Plình,

⁵ oh daq hadai tìah ka hmu rìh, jah broq hnim
yang, broq pajàu hadròeh, òeđeq hu dèch ramènh
yang, canòm ka Chuaq Jesus Christ òeđeq jah lem
ka manoh Boc Plình.

⁶ Majah qmang aih ta Hset Hadròeh i achìh
rameh:

“Ngan kô! Au òeđeq ta Siôn,
mòeq toq hmo mùm hnim canaq khoe jah raih,
cabô lùì Haq aih,
ùh jò leq ep camaih”.

⁷ Qmang aih, ka oh daq ma khoe lùì, aih hmo
canaq, mahaq ka mangai ma ùh lùì,
aih hmo thòq broq hnim khoe tèm đac,

Mahaq khoe wìa hmo mùm hnim,
aih hmo:
“broq ka mangai kan catoeh,
hmo broq ka tacro”;

⁸ wì catoeh ka hmo aih taiq wì ùh iu tiaq Bàu, trong aih khoe tèu ðòeq ka wì haq enh adroe.

⁹ Mahaq oh daq aih adrech ma khoe jah ràih, aih la pajàu da hnim bùa, aih xinoe hadròeh, aih mangai da Boc Plình, ðòeq ka oh daq lam anoe kan loq waq da Boc Plình aih Mangai ma khoe creò ka oh daq loh enh noè clam cluiq, trùh ta kan ðìq jaq qngah qngai da haq;

¹⁰ oh daq nèh haq ùh xài mòeq xinoe, yàng manòeq kô aih xinoe da Boc Plình, nèh haq ùh jah kan loq waq, yàng manòeq kô jah ka loq waq.

¹¹ Yôi yôiq oh daq da au, oh daq bu dàng mangai enh diac qnoeq, mangai lam ka trong, au pariaq oh daq ep wìa ka hangai bài yiniq xech akia ma ònh, aih bài yiniq ma tablêq hlài ka mahua yiang pì.

¹² Ep rìh lem jang taqne mangai diac wì, dôq wì haq aih mangai ma toq capoch qmèq đac ka oh daq tiaq taiq ka mangai ngang dù, hnoq yiniq broq lem da oh daq, aih èh hì Chuaq ma trùh hmàih ka bèn, wì haq jah manè apôi Boc Plình.

¹³ Taiq Chuaq, pì majah ep iu tiaq ranenh kon mangai paqnoh, yac ka bùa, aih mangai i cwàng haqnèq,

¹⁴ yac ka bài cwan, aih mangai bùa ma thê haq trùh ðòeq baxa mangai ma broq dù, ðòeq manè mangai broq lem.

15 Majah qmang aih, manoh Boc Plình ma enh aih oh daq broq trong lem đòeq bàt hacùng bàu bài mangai blùng ratút.

16 Drah rih tiah ka mangai ma pi tawac, mahaq apaq yỏc kan ùh tawac aih hu broq bai prình kan dù, ep ngan rađeh kô hapỏng díc da Boc Plình.

17 Khỏh loq ta-iu ka rìm ngai, loq waq ka oh daq, iu yủq ka Boc Plình, loq iu búa.

Mangai broq đeh hapong

18 Mangai hapỏng, ep yỏc manoh điq jah loq iu yủq ka Boc Plình đòeq iu tiaq dềh cla craq, ùh xài toq ka cla craq ma khun khauq loq hèm ka oh daq, mahaq hloe xam cla craq ma ùh taq atỏq.

19 Majah qmang aih joq khỏh manề, tàng cabô taiq manoh loq yủq ka Boc Plình dài haq majah ep chiủq đeh kan xalep ta kan ùh taq atỏq.

20 Tàng oh daq broq qmềq, oh daq chiủq àt jò wì jềh, aih i cleq hu catềh? Mahaq tàng oh daq broq lem, yàng ep chiủq kan xalep, aih raq xôq ramot enh ngềa Boc Plình.

21 Oh daq khoe jah creo trùh jang aih, majah qmang aih Christ khoe chiủq xalep ka oh daq, đòeq broq dua ka oh daq hnoq, đỏq oh daq hu tiaq teo jềnh haq;

22 Haq qnhỏq i broq qmỏe yiniq lui cleq, ta hacùng haq ùh i mỏeq nà bàu paqnút;

23 Jò wì hnap hnuq, haq ùh da hnap hlài, chiủq nanxa haq ùh hacam hlài ka wì, mahaq phủq rađeh ka Boc Plình aih Mangai hadrah taq atỏq;

24 Haq pỏq wề đỏng yiniq lui bèn ta chac haq tanỏe long pagat, đỏq bèn mangai khoe cachít ta

yiniq lui, jah rih ka kan taq atoq; canòm ka teo rabàn ta chac haq bèn jah brêh ka yiniq.

²⁵ Majah qmang aih oh daq tiaq ka trùu lac, yàng manòeq khoe jah hlài ti Mangai ban trùu xam Mangai wèq mahua yiang pì.

3

Ŏng mai rih ti dabau

¹ Hadai qmang aih, mangai broq mai ep iu tiaq deh ōng, ðòeq tàng loq i mangai ōng leq ùh tiaq trong Chuaq, yac ka ùh anoe xi bàu, yàng hnoq trong mai haq rih acaq, aih èh haq hi tiaq diq,

² majah qmang aih, haq hnoq trong acaq oe da pì aih hliang lem loq iu.

³ Ùh dùh chaq dahwèq ðòeq anì toq enh gùng, qmang ka broq xàc, asràng wang, atàc toq eo cwàn lem canaq;

⁴ mahaq ti chaq kan palàng enh dalam, aih kan hliang lem ùh hnhung lùch ùh atêh atong da manoh laq alàng, aih trong lem enh ngèa Boc Plình.

⁵ Majah qmang aih bài gucadrì hadròeh calah nèh, tangèh canòm ka Boc Plình, chiùq iu tiaq deh ōng, diq palàng raðeh qmang aih;

⁶ qmang ka Sara iu tiaq Apraham, creò ka Apraham aih craq da raðeh, tàng pì broq trong lem, ùh i yiniq cleq broq ka pì ep yùq crè ta manoh, aih èh pì hi wìa kon adrùh da Sara.

⁷ Hanoh qmang aih, mangai broq ōng, drah mahnu dèh kan rabiaq ta trong rih acaq dèh ti cadrì, ep loq hèm ka wì haq, majah qmang aih wì haq yeo ùh nèn ðeh, qnah hòm wì haq hadai

wiang jah xôq ramot kan rih ti oh daq, dài majah ep ta-iu ka wì, dôtq ùh hìaq i yiniq cleq broq ka pì manhài jò waiq khàn.

Chiuq xa-ep jò broq trong lem

⁸ Pulùch, dítq dõng oh daq ep mòeq manoh bình kan loq tamèt xam kan loq waq ka dabau, i manoh loq hanò rai loq hacom hamon rađeh.

⁹ Apa q yỏc kan dù ðòeq patem chau kan dù, apa q yỏc bàu qmèq hu patem ka bàu qmèq, mahaq ep waiq xôq ramot ka wì, taiq ajang aih raq oh daq ma khoe jah creò ðòeq hu jah xôq ramot.

¹⁰ Èh hòm,
Mangai leq bẻh kan rih,
Enh jah hnoq hì lem.

Haq aih ep wẻq dẻh hacùng bàu,
Apaq capoch trong dù xam bàu loq qnùt;

¹¹ Ep wia ka trong dù, broq trong lem,
Chaq kan catẻm ðòeq hnẻn tiaq,

¹² Majah qmang aih mat da Chuaq haqmiang
ngẻn mangai taq atoq,

Don Haq ti tamẻng bàu waiq khàn da wì aih,
Mahaq hadrò Chuaq tablẻq hlẻi ka mangai broq dù.

¹³ Tẻng oh daq nhet ka broq lem, aih ma i cabỏ
ma broq qmẻq ðòeq haỏ hlẻi ka oh daq?

¹⁴ Tẻng oh daq broq troq mahaq ep chiuq kan xalep, aih oh daq jah xôq ramot. Apa q yủq ka bàu wì hacam, hadẻi apa q hlẻ ta manoh;

¹⁵ mahaq ta manoh oh daq ep padẻch Christ broq Cla craq rađeh. Yac ka jò leq dua padon ðòeq hu padreo bàu ka mangai ma bẻch trửh kan

tangèh da oh daq, mahaq ep khun khaug rai loq ta-iu,

¹⁶ ep i manoh hliang lem, dôq bài mangai ma halê trong rih acaq lem linh da oh daq ta dalam ka Christ, ep camaih dèh ka bàu wì haq ma capoch troq oh daq;

¹⁷ tàng manoh Boc Plình khoe enh dèh qmang aih, ôq, bèn chiug xalep jò broq trong lem aih yeo lem ka chiug xalep ka broq trong qmèq.

¹⁸ Majah qmang aih Christ hadai khoe chiug cachit ka yiniq lui mòeq yàng, haq aih kan taq atôq am ka mangai ùh taq atôq đòeq aràng bèn trùh ti Boc Plình, yac ka chac hamac da haq khoe cachit, mahaq mahua yiang da haq oe rih.

¹⁹ Xi mahua yiang aih haq lam anoe ka bài mahua yiang ma qnang oe tù,

²⁰ aih bài mangai enh qnhòng nèh khoe ùh iu tiaq Boc Plình, ta qnhòng da Nô-ê, aih jò Boc Plình khoe chiug àt chiug gòm trùh jò boang jah broq gèh, i toq biaq ngai raq jah dèch claih khoe ka diac kàn, ta aih rahem ngai dech do.

²¹ Diac hanam aih, broq qmù ramènh baptem manòeq kô đòeq dèch oh daq, ramènh aih ùh xài đòeq qnheo hreo kan amùda da chac hamac, mahaq tìah ka bàu hatèu lem hloh enh manoh qngah hliang da oh daq am ka Boc Plình, canòm ajang kan rih hlài da Chuaq Jesus Christ,

²² aih Mangai ma khoe hlài ta plình, manòeq kô qnang haqngui enh qma Boc Plình, bài bình plình, bài bùa, xam bài wèq cwàng dìq enh qneq ka Haq.

Kan rih maneo

¹ Qmang aih, tiah ka chac hamac da Christ khoe chiuiq xa chiuiq jiq, oh daq hadai padon dèh manoh qmang aih diq, majah qmang aih mangai leq chiuiq jiq chiuiq xalep ta chac hamac aih khoe jah claih ka yiniq lui,

² waq toq oe rih ta chac kô pang leq, aih pi dùh tiaq cadèh hòm trong kon mangai ta crông taneh kô ma ònh, mahaq ep tiaq manoh Boc Plình enh.

³ Nèh haq oh daq khoe rih tiaq kan qmèq da wì enh gùng: tuàng buàng, enh toq trong mèq, bù bia, acaq ôq pi palap, pagôq racaih, kùh waiq kiac qmù.

⁴ Wì hnoq oh daq ùh broq tiaq wì haq trong tango anang, aih wì loh ka hamaih rai jù lê oh daq.

⁵ Mahaq wì haq ep taqmon hlài ka Mangai ma padon hadrah mangai rih xam mangai cachit.

⁶ Taiq aih raq, Bàu Lem majah khoe ep anoe ka mangai cachit, òèq atiq ka jò wì haq khoe ep pòq kan hadrah tiaq chac da kon mangai, mahua yiang wì haq jah rih ti Boc Plình.

⁷ Kan atiq lùch da rìm yiniq khoe haqnap, ep rabiaq rai loq hamang òèq waiq khàn.

⁸ Adroe aih, rìm ngai ep i manoh nhet ka loq waq ka dabau joq qnàng, majah qmang aih kan loq waq jah gahnáp bàc yiniq lui.

⁹ Mangai kô xam mangai tau ep òh dabau ma laq alàng apaq mamùc.

¹⁰ Rìm ngai ep yòc dèh kan tabàih òeh ma khoe jah òèq wiang hanò ka dabau, tiah ka mangai wèq kùng hang ma ùh tablòq manoh, wèq bài kan tabàih dech crài ka dabau da Boc Plình.

11 Tàng loq i cabô broq mangai hnài, aih ep capoch wop qmang ka bàu ma loh enh Boc Plình; tàng loq i cabô patìh trong leq, haq ep patìh xi padren Boc Plình tah am, òòeq yiniq Boc Plình jah qngah rìm trong ajang Chuaq Jesus Christ; aih Mangai jah kan ranhòm, cwàng itai mòeq òòeq ùh lùch. Amen.

Bàu pariaq bòe mangai xalep ka Chuaq

12 Oh daq da au, jò pì oe ta tanùh ùnh kan qnhro, apaq hamàih tìah taiq ka rađeh glàm bài kan lah halac.

13 Mahaq oh daq wiang jah nanxa ti Christ pang leq, aih drah lem bùi pang aih, òòeq hì ranhòm da Christ trùh, oh daq hadai wiang jah kan lem bùi òòeq jaq.

14 Tàng joq taiq yiniq Chuaq Jesus Christ wì jù lê capoch qmèq đac ka oh daq, aih pì jah xôq, majah qmang aih kan ranhòm xam Yiang Hadròeh da Boc Plình jràp enh qnhèq ka pì.

15 Taqne oh daq apaq i cabô chiùq xa tìah ka mangai jêh đac mangai, tìah ka mangai atùng, tìah ka mangai ratauq, tìah ka mangai tì chaq baxrùq yiniq mangai qnoeq.

16 Mahaq cabô chiùq xa taiq òòeq tìah Chuaq, aih apaq camaih, mahaq drah manè apôi Boc Plình taiq rađeh khoe jah pòq wê yiniq haq aih.

17 Majah qmang aih khoe trùh jò, aih jò kan hadrah jah baxèm qmòe enh hnìm Boc Plình, tàng baxèm enh bèn, kan pulùch da bài mangai ma ùh iu tìah Bàu Lem da Boc Plình aih èh qmang leq cadèh?

¹⁸ Tàng joq mangai taq atoq ùh i hlàu cleq ka jah dèch, aih èh bài mangai ùh i ka Boc Plình, bài mangai i yiniq lui qmang leq cadèh?

¹⁹ Qmang aih bài mangai chiùq xalep tiaq manoh Boc Plình enh, apaq tagah ka broq trong lem òdeq phùq dèh mahua yiang ka Mangai broq plình crõng taneh ma ùh jò leq tablòq manoh.

5

Achìh ka gucraq wèq tagop xam ka bòe guqyoh

¹ Au tanap bàu ka bài gucraq ma oe qne oh daq, au kô hadai gucraq qmang ka wì aih, au kô mangai ma khoe hnoq qmòe kan jìq kan xalep da Christ, mangai ma hadai wiang jah kan ranhòm ma padon trùh kô èh:

² drah wèq ban tagop da Boc Plình ma khoe thê oh daq, broq yiniq aih ùh xài i cabô panan mahaq taiq kan lem bùi ta manoh, ùh xài òdeq hu yòc kùng baha ùh hadròeh, mahaq taiq dìq dèh manoh,

³ ùh xài òdeq hu broq bùa bài kon trùu enh qneq ka cwìang oh daq, mahaq òdeq broq dua lem ka wì.

⁴ Jò Mangai ma broq gàu bài mangai ban trùu trùh, aih èh oh daq hi jah cadoh diac plình qngah lem, ùh jò leq bròq croh.

⁵ Hadai qmang aih bài mangai qyoh hanam, ep iu tiaq wì gucraq. Rìm ngai ep caxùnh yòc kan loq hamon rađeh, majah qmang aih Boc Plình tablêq ka mangai loq padèch rađeh, mahaq am xôq ramot ka mangai loq hamon rađeh.

⁶ Qmang aih, drah qnoh raðeh enh qneq ka ti kǝng i cwiang itai da Boc Plinh, ðòeq trùh jò dèh jò, haq hi dèch atǝc oh daq.

⁷ Drah qnèp dǝng ka haq kan yùq crè ta manoh, majah qmang aih haq mangai ma wèq ban pì.

⁸ Drah loq kèn rai loq clang ka raðeh: Mangai mangai ma tagit ka pì tiàh ka baco ka ùm, ti lam dudan ka pì ðòeq ti chaq ngan mangai leq haq jah lonh.

⁹ Ep yǝng cajap ta manoh lùì ðòeq hu tablêq ka haq, majah qmang aih bèn loq oh daq bèn jàp jìa ta crǝng taneh kǝ hadai glàm nan no tiàh ka bèn.

¹⁰ Boc Plinh aih xèm da rìm kan tabàih khoe creo ka oh daq trùh ta kan ranhòm mòeq ðòe da haq enh dalam ka Jesus Christ, jò oh daq khoe chiùq xalep ðò toq biaq, aih èh cla haq raq broq ka oh daq jah gèh geo, hagau haginìh rai tah tam paden ka oh daq.

¹¹ Waiq kan i cwiang itai hlài dìq ta haq, mòeq ðòe ùh dìq ùh lùch! Amen.

¹² Au canòm ka Sinwan, mangai oh daq ùh tablòq manoh, au achìh toq biaq nà kǝ ðòeq hu pariaq oh daq, hu panhìn ka oh daq loq aih joq kan tabàih dech enh Boc Plinh, oh daq ep yǝng cajap ta aih.

¹³ Tagop Hadròeh da bài mangai jah ràih oe ta Babyłòn, i bàu hmàih ka oh daq, kon da au aih Mǝc hanoh qmang aih.

¹⁴ Oh daq ep yǝc kan loq waq ðòeq hìp hmàih ka dabau.

Waiq kan catèm oe dìq ti oh daq ma oe ta Chuaq Jesus Christ!

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d